

編號 2 號

【攀樹仔】徐姿華原作

六月初，學校安排佢等體驗「攀樹仔」，請來蓋有經驗个教練團教佢等攀樹仔。活動該日，大家都蓋期待，先生帶等興著著仔个佢等來到集合个地點。教練先講解規則同愛注意个事情，每一個人都目金金、耳角角仔聽啊一等入腹¹，同平常時上課昏嗒昏嗒²个樣式差蓋多。

續下來，教練教佢等著護具、戴手落仔同安全帽，帶佢等去到學校該頭百過年个大榕樹下。其他个教練早都準備好勢，同蓋多定滑輪並索仔固定在樹頂頂，這就係佢等愛攀樹仔个工具。攀樹仔同跋樹仔無共樣，攀樹仔係利用索仔、吊帶、鈎環、踏索這兜，手腳搵手出力，撐起圓身一步一步攀上去；教練講解搭做咗一遍過後，愛換佢等上場咗。

一開始，每一個人都驚驚毋敢行前去，大膽个阿智好絕絕仔搶先愛攀，體育股長阿宏也行前去。教練口頭指導，佢等蓋順利慢慢仔緊攀緊高，攀啊離地泥 4 公尺恁高个時節，還笑咪咪仔翕相留念；佢等又繼續攀一路上，一直到教練設定个目標 8 公尺高

¹ 入腹：音 ngib bug`；進入到心中，喻很認真、很專心。

² 昏嗒：音 fun` de`；喻呆滯狀。

該仔，拿著「攀樹仔證書」正坐啊樹梗寮一下。佢兩儕在樹頂頂一等歡喜，緊叻佢等遽啊攀上去，講樹頂頂蓋好搞。

佢攀樹仔个時節一等緊張，手腳停動毋得，索仔擲啊撇去撇轉，一下撞著樹仔、一下晃去戳著³同學；阿芬也無過登真，索仔擲去迂迂轉，硬硬會打結。樹頂、樹下有人嗆啊哈哈滾、有人驚啊腳底癢癢緊嗽眇，十分鬧熱。盡無簡單，佢攀啊 5 公尺高咗，手軟腳怠想愛停下來，在樹頂个教練就搵手分佢坐在樹梗頂轉擺；佢扳等樹梗緊敲大氣，涼風吹來同頭先个煩躁、緊張吹啊毋見核咗；對樹頂看出去遠遠个所在，闊野野金黃金黃个禾田同青山合等藍天白雲，分人心情十分鬆爽。

好恬恬仔，一列紅色間等白色个普悠瑪號火車對田脣咗啊過，「哇！火車！」樹頂高个同學做一下大聲緊叻，還在樹下个同學就嘴勺勺仔緊看頂頂，望毋得好共快攀上樹頂共下寮。

這擺攀樹仔，有人蓋驚高、有人毋敢謙樹極，驚該無躡著樹極、無把扼个感覺；毋過，經過教練、同學搵手同鼓勵，每一個人學會信任、承擔、合作同勇敢；也分佢等知得面對困難莫驚驚縮縮，就係愛大膽去克服，身邊定著會有人肯同佢等搵手啦！

³ 戳著：音 cog` do`；碰撞到。